


**■ COLUMNA**

# Dat en egl

DA GIUSEP NAY

**S**a metta avant, i dat guerra e nagin va vi (Sandburg). Persequitant la discussiun en las medias sur la smanatscha da la dispariziun da La Quotidiana dat l'inactivadad rumantscha en egl, e vegn la moda da dir enconuschenta citada endament a mi.

**L**'editur da La Quotidiana emetta a caschun dal giubileum da 20 onns da quella in signal tut auter che cler e lai allura suandar in ultimatum che munta la mort da la gasetta dal di rumantscha, sch'i na vegn betg agì. L'alteraziun è gronda e da tuttas varts vegn punctuà l'immensa impurtanza d'ina pressa per il manteniment da nos rumantsch. La responsabladad per ina gasetta quotidiana rumantscha para dentant nagin propi d'avair ni – tant sco enconuschent – da vuler sorprender. Per la Lia Rumantscha è mo «betg tuttina» tge che succeda cun la LQ. Ed ils auters acturs reageschan cun la renomada risposta sin il clom dal Segner a la tschavera cumineivla: «habeas me excusatum» jau hai da far auter. Quels che vulan dapi in temp esser ils sulets vairs defensurs dal rumantsch queschan en l'essenzial. E la politica na vul betg intervegnir.



**C**h'il secretari general da la LR anc en uffizi vul savair nagut d'in cumplot dals reponsabels rumantschs encunter l'editur, supponi da quel, è anc chapibel. Ch'el e che tut ils auters na vesan betg la gronda mancanza da reacziun e comunicaziun envers il purtader actual da La Quotidiana sin ses ultimatum – sche er zunt sorprendent e betg vaira chapibel – fa or da l'immaginaziun da la dicziun citada l'entschatta ina realitad zunt deplorabla ed el medem mument alarmanta.

**S**ch'ils politichers cusseglian al nov secretari general da la LR – tenor sias expectoraziuns els Contrasts – da betg far politica, allura contrastescha quai a moda tragica cun la posiziun da la grupp rumantscha dal cussgel grond d'interprender nagut en la chausa la pli smanatschanta per il rumantsch. Quà

san ins sulet sperar ch'i na saja betg il davos pled da questa vart, essend ch'il salvament dal rumantsch è ina obligaziun statala – ed aschia era politica.

**I**l secretari da la LR n'ha segir betg da far ina «politique politicienne», sco nos cunpratiots romands dian. El è dentant quel che ha dad esser davant en la publicitad cura ch'i sa tracta da politica en favur u disfavour dal rumantsch. Ed en quest connex spetgan Rumantschas e Rumantschs tut auter ch'ina cuntinuaziun da l'inactivadad disgraziada dal secretari partent, mobain che Martin Gabriel laschia adina puspei udir sia vusch sco in zenn per ils interess da la Rumantschia ed actualmain per il mantegniment d'ina gasetta dal di rumantscha; e quai gist er vers la politica chantunala e federala. I sa tracta da nagut auter e da nagut pli impurtant che da far valair ils dretgs costituziunals da nossa lingua e cultura minoritara, ils quals na dasggn betg restar mo sin il palpiri. E tgi ha da far quest pensum en emprima lingia scha betg la Lia Rumantscha? Viarclas da cunvegnientschas da prestaziun, concessiuns e programs existents èn stgisas – en temp da gronda urgenza.